



Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Aningaaserivimmik, kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqquneqarnissaannut Inatsisartut aalajangiiffigisassaattut siunnersuut. Nalunaarusiaq ukioq 2025 aallartinnerani Inatsisartunut agguanneqassaaq.

(Inatsisartunut ilaasortaq Jens Napaattoq, Naleraq)

Tungavilersuut:

Ukiopassuanngulersuni naalakkersuinikkut eqqartorneqartuarpoq, aningaasat, ilami aningaasarpassuit nunatsinni annerusumik kaaviiartinnagit sulisinnagillu nunatsinniit avammut aniatinnartakkatta qanoq iliornikkut nunatsinnut iluaqutaanerusumik aaqiivigineqarsinnaanerat.

Nunatta naalagaaffinngornissaa pimoorunnerussagaanni, nunatsinni aningaasaqarnerup Nunatsinnut inuinnullu pitsaanerusumik sunniuteqarluarnerusumillu aaqiissuunneqarnissaa isumagissallugu Naleqqamiit piffissanngorsoraarput.

Maannamummi takusinnaavarput nunatta innuttaasullu aningaasaataasa ingerlanneqarnerat aningaaserivinnik avataaniit piginnittuinnangajaavilinnik marlunnik nunatsinnit pigineqanngitsunik aqunneqarlutik ingerlanneqartut. Aamma isumaqarpugut nuna naalagaaffinngorusuttoq nunaqavissunik nunatsinniillu pigineqavittumik aningaaseriveqarnikkut imminut sullinnissaminik qulakkeerinnittariaqartoq.

Inatsisartut siornatigut assingusumik misissuititsinissaq akuersissutiginiuuat¹, kisiannili tamakkiisumik naammassineqarnikuunngitsoq, maannalu paasissutissanik ullutsinnut nutarsakkanik amigaateqartoq.

Taamaammat qulaani misissuisitsinertut taaneqartoq Naalakkersuisut peqquneqarlutik ingerlatissagaat siunnersuutigaarput, tungavissaqarluartumillu oqallinnissaq kingorna piniassamat, siunissami aningaaserivimmik kalaallinik tamakkiisumik amerlanerussuteqartumilluunniit pigineqartumik pilersitsisoqassanersoq aalajangiiffigineqarsinnaalerumaarpoq.

Pisortanut aningaasatigut allaffissornikkullu kingunerisassai:

Misissuititsinermut pisortatigut aningaasartuutissat nalilerneqarput 125-250.000 kr. missiliussagai, tassa sulisorineqartussap ¼ -miit ½-imut ukiumut nalinga. Naalakkersuisut

¹ UKA2017/135



Naleraq

allamik isumaqassagaluarpata tamanna naalakkersuisunit suliap siullermeerneqarnerani akissummi nassuiaateqarfigineqassasoq piumasarissavarput.

Namminersortunut aningaasaatigut allaffissornikkullu kingunerisassai:
Soqanngilaq.

Innuttaasunut aningaasaatigut allaffissornikkullu kingunerisassai:
Soqanngilaq.